



ПАВЕЛ АПОСТОЛДЫН ФИЛИМОНГО САМАРАЗЫ

1

¹Иисус Христостын кижендүзи Павелден ле Тимофей карындаштан — бисле кожо иштеп турган кару Филимонго, ²анайда ок Апфия эжебиске, тартыжуда кожо туружып турган Архиппке ле айлындагы серкпеге.

³Слерге Кудай Адабыстан ла Иисус Христос Кайраканнан жакшылык ла амыр жетсин.

Алкыш-быйан ла мүргүл

⁴Мүргүп тургамда, сени жаантайын эске алып, Кудайымга алкыш жетиредим, ненин учун дезе ⁵ончо агаруларды сүүп, Иисус Кайраканга бүдүп турганынды угуп жадым. ⁶Мүргүп турум, бүдүп турганыннын шылтузында сени ончобысла текши болзын деп. Мынызы сени Христоско болуп бисте бар ончо жакшыны билип аларына экелер. ⁷Сенин сүүжин меге улу сүүнчи ле коот берген ине, сен ажыра, карындаш, агарулардын жүректери токунаган.

Павелдин Онисим учун сурагы

⁸Онын учун нени эдетенинди жакарарга Христостын Бойында улу тидимдү болуп, ⁹је сүүшке болуп сурап турум. Өскө кем де эмес, мен, карган Павел, эмди дезе Иисус Христостын кижендүзи

бойым, ¹⁰ сени Онисим* уулым учун сурап турум. Ол кижендү тужымда менин уулым боло берген. ¹¹ Башкыда ол сеге туза жок болгон, эмди дезе, сеге де, меге де тузалу. ¹² Мен оны сеге кайра ийип жадым, оныла кожо жүрегимди. ¹³ Мен Сүүнчилү Жардын киженинде жүрген тужымда сенин ордыга меге болушсын деп, оны бойымла кожо артырарга санангам. ¹⁴ Же жөбинг жокко нени де этпеске санангам. Сен жакшыны албанла эмес, акту күүнингле этсин деп турум. ¹⁵ Айса болзо, ол сенен кыска өйгө айрылган, сен оны жажына жуудып алзын деп, ¹⁶ кулды чылап эмес, же кулдан бийик чилеп, кару карындажынды чылап. Ол меге сүрекей баалу, же сеге онон баалу, кижиде чилеп, Кайраканнын Бойындагы карындаш та чылап.

¹⁷ Анайдарда, мениле текши болзонг, оны мени чилеп жуудып ал. ¹⁸ Ол сеге жаман эткен болзо, эмезе төлүлү болзо, сеге мен төлүлү деп бодо. ¹⁹ Мен, Павел, бойымнын колымла бичидим: мен төлөп берерим. Сен бойынды бойың да меге төлүлүңди айтпай жадым. ²⁰ Эйе, карындаш, Кайраканнын Бойында меге тузалу бол, жүрегимди Христостун Бойында токунадып кой.

²¹ Сөсуккурына бүдүмжилү болуп, айдып турганымнан көп эдеринди билип, сеге бичидим. ²² Анайда ок меге кып белетеп кой, ненин учун дезе Кудай мүргүгенеерди угуп, мени слерге келерге быйан берер деп, иженип турум.

Эзен айттырыштар

²³ Христос Иисуска болуп мениле кожо кижендеткен Епафрас, ²⁴ кожо иштеп турган улузым Марк, Аристарх, Димас ла Лука сеге эзен айдып турулар.

²⁵ Иисус Христос Кайраканнын жакшылыгы слердин тыныгарла болгой**.

* Гректеп «тузалу» дегени.

** Кезик жебрен түрбектер «Аминь» деп сөслө түгенет.